

# Txirritola

ARAMAIO / Barikua / 2004ko uztailaren 23a / 118. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

## Albinako itxitura eta udal zerbitzuak, osoko batzarrean


UBANE MADERA

Datorren astean egingo dute oporren aurreko azkeneko osoko bilkura. Besteak beste, Albinako itxitura eta udal zerbitzuen esleipena aztertuko dituzte zinegotziek.

Berez, oraingo astean zen udalbatzarra opor aurreko azkeneko batzarra egiteko, baina gai gutxi zituztela-eta, astebetetz atzeratu dute: datorren eguaztenean, hilak 28, izango da, 18:00etan. Zinegotziek Albinako itxitura eta udal zerbitzuen esleipena aztertu beharko dituzte, besteak beste.

### ALBINAKO ITXITURA

Albinako itxitura dela-eta, kontua da jabe pribatuek 80ko hamarkadan ipinitako demandaren gaineko sententzia iritsi zaiola Udalari. Haren arabera, Albinako hesia bere horretan gera daiteke, beti ere, dauden hiru sarrera eta bideko parrilla kentzen badituzte. Arazoa da horiek kenduz gero, abereak errepidera aterako direla. Horrenbestez, hiru irtenbide proposatu dizkiote Udalari: hesia errepidearen bazterreraino ekartzea (Udalaren eskumenaren mugaraino); Udalak behar duen lur-zatia erostea edo zati hori desjabetzea. Zer



Albinako itxiturarekin zer egin erabaki beharko dute zinegotziek eguaztenean.

egin erabaki beharko dute eta seguru aski kasuaren ardura duen abokatua batzarrean izango da.

Bestalde, udal zerbitzuen esleipenari dagokionez, orain arte egindako esleipenez gain, osoko batzarri jakinaraziko diote kale garbiketa eta lorategien eta hilerrien mantenuaren zerbitzua ere esleitu dituztela. Hain zuzen ere, Gas-

teizko Indoor Garden SC enpresak egingo ditu lanok. Gauzak horrela, besteak beste, enterramenduak egiteko, ur eta argindar kontagailuak irakurtzeko eta kiroldegia kudeatzeko zerbitzuak esleitzea falta zaio Udalari. Baita ur eta saneamenduaren mantenua ere. Azken horren kasuan, gainera, Udalak ez du eskaintzarik jaso.



## Barajuenen, Andramari jaiak

Barajuendarrak jaietarako gertu-gertu daudela jakinarazi digu Lourdes Gardoki auzo alkateak. Andramari egunean, besteak beste, 12:00etan meza egingo dute, auzoko abesbatzak abestuta. Eta ohiturari uertsita, 18:00etan, ume txikiak ekarriko dituzte Andre Marirengana, bedeinka ditzaten. Karta-jokoak ere izango dira egun horretan. Bigarren egunean, berriz, 12:00etan ere meza esango dute, auzoko hildakoen alde. Eta bai eguerdian zein gauean, auzotarrek bazkaria eta afaria egingo dituzte. Auzo alkatearen esanetan, ia-ia auzotar guztiak joaten dira, 80-100 bat lagun. Arratsaldean, berriz, umeendako jolasak egingo dituzte eta Iñigo Magoak saioa egingo du. Eta jakina, horrenbeste arrakasta duen urdai-azpiko apustua ere egingo dute Barajuengo jaietan.

## Andramari jaietarako guztia gertu dute Oletan

UBANE MADERA

Andramari egunarekin batera iristen dira Oletako jaiak. Abuztuaren erdialdean izan arren, dagoeneko guztia gertu-gertu dute oletarrek. Kontatu digutenez, hiru eguneko jaiak antolatu dituzte. Tartean, Foru Aldundiak antolatuta, umorezko antzerki saioa izango da.

Andramari egunean, 12:00etako mezarekin hasiko dituzte jaiak. Horren ostean, andreen eskulanean erakusketa ipiniko dute, plazan; gero Aurrekua dantzatu dute; Vermouth dantza izango da horren ostean; arratsaldean, umeendako jolasak, eta gauean, erromeria.

Hurrengo eguna ere meza esanez hasiko dute, auzoko hildakoen alde. Gero, Oletan jaiotakoek bazkaria egingo dute, dantzaldi eta guzti. Horren ostean, 20:00ak inguruan, zozketa egingo dute: Benidormera bidaiata. Eta bukatzeko, hirugarren egunean, abuztuaren 17an, besteak beste, tute, briska eta mus txapelketak jokatu dute.

### ZIRKO TTIPIA

Eta lehen esandako moduan, abuztuaren 15ean, Arabako Foru Aldundiak antolatuta, Zirko Ttipia izeneko taldearekin umorezko antzerki-saioa egingo dute Oletan. *Giriguai* lana antzeztuko dute, 18:00etan.



Aurreneko egunean, andreek egindako eskulanean erakusketa ipiniko dute, plazan.

## LABUR

### Argindarra eta ura uztaillean kobratuko dute

Udaletik jakinarazi digutenez, maiatzari eta ekainari dagokion uraren eta argindarraren kontsumoa uztaillean kobratuko dute. Hori bai, ur eta argindar kontagailuak irakurtzeko udal zerbitzua esleitu barik dagoenez, gutxi gorabeherako kontsumoa kobratuko dute. Horretarako, azken lau irakurketetan izandako kontsumoaren batz bestekoa egingo dute. Gero, irailean kobratuko dituzten ordainagiritan eguneratuko dute egoera.



## TELEFONO JAKINGARRIAK

OSASUNA / LARRIALDIK	
Osasun etxea (txandak)	945 44 53 40
Botika	945 44 50 03
Udaletegia	945 44 50 16
Erizainitza (Arrasate)	943 79 71 99
Gurutze Gorria (Legutio)	945 45 52 52
San Martín Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zuñako Eskualdea	945 43 01 67
Suhiltzaileak (Zubillaga)	943 78 28 00

## AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	
GASTEIZ	ARAMAIO	ARRASATE
	07:50	08:05
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:00	20:15

**OHARRA:** Izartxoaren duten orduetan eskaeraren arabera zerbitzua eskaintzen dute. Auzoetako bizilagunei zuzendutakoa da, eta autobusa erabili gura badute, bezperan deitu behariko dute honako zenbaki honetara: 629 54 59 23

## OHARRAK

## BARIKUKO ZINEMA

Jakinarazi digutenez, zine emanaldietan aldatzeko izan dira. Kontua da joan den barikuan *El Señor de los Anillos* trilogiaren aurreneko zatia ipintzeko zirela, baina, arazo teknikoen eraginez, ezin izan zutela ipini. Horren ondorioz, gaur, barikua, ipiniko dute abenturazko eta fantasiarako film horren aurreneko zatia: *La comunidad del anillo*; gero, hurrengo barikuan, hilak 30, ipiniko dute bigarrena: *Las dos torres*. Eta hurrengo egunean, zapatuan, hilak 31, emango dute azkena: *El retorno del rey*. Azken horren kasuan, 22:30ean hasi beharrean, 22:00etan hasiko da emanaldia, filma oso luzea da-eta. Eta abuztuko barikuetarako ere gertu dute egitaraua herriko zinema-zaleek. Hala, abuztuaren 6an, *Cuando menos te lo esperas* (komedia) emango dute. Abuztuaren 13an, *House of Sand and Fog* (drama). Abuztuaren 20an, *Monster* (drama). Eta bukatzeko, abuztuaren 27an, *La Sonrisa de Mona Lisa* (drama) emango dute.

## Uribarrin, San Esteban jaiak, abuztuaren hasieran

UBANE MADERA

**Abuztuaren hasieran, San Esteban da. Eta San Esteban egunean auzoko jaiak ospatzen dituzte Uribarriko bizilagunek. Hain zuzen ere, abuztuaren 3rako, 4rako eta 5rako antolatuta dituzte ekitaldiak.**

Halakoetan ohienez, 12:00etako mezarekin hasiko dituzte San Esteban jaiak uribarriarrek, abuztuaren 3an. Egun berean,

mus eta briska txapelketak jokatzen hasiko dira, arratsaldean, eta gauean erromeria izango dute, dantza saiotxo egiteko.

Bestalde, hurrengo egunean, eguerdian karta-jokoen finalak jokatuko dituzte. Arratsaldean, berriz, Kurtzetan plater tiroketa egingo dute eta auzoan umeendako jolasak izango dira. Eta gauean, erromeria egingo dute.

Eta bukatzeko, abuztuaren 5ean, eguena, afaria egingo dute auzotarrek.



ARTXIBOA

Abuztuaren 3an, 4an eta 5ean izango dira Uribarriko jaiak.

## BOTEPRONTOAN/ Juan Antonio Aretxaga · Untzillako eta Suñako auzo alkatea

*“Gure artean ondo konpontzen gara eta harreman ona eta gogoia izanez gero, gauzak egin daitezke”*

**U**ntzilla eta Suña auzoak izango ditugu berbera jarraian. Juan Antonio Aretxaga auzo alkateak etxean hartu gaitu auzoko kontuak esateko:

**Untzillan bizi bai, baina hementxo zara?**

Elosun jaiotakoa naiz, eta gero Aretxabaletan bizi izan nintzen, aita hangoa zen-eta. Baina 14 urte daramatzat hemen ezkondua eta guztiz aramaioarra sentitzen dut nire burua. Mendibitzu baserrian bizi gara. **Alkate zaren aurreneko aldia da? Zela aukeratzan duzue?**

Bai. Bozketan bidez. **Lan asko ikusten duzu datozen lau urteotarako?**

Auzoaren egoera ez da txarra. Uste dut beste auzo batzuk Untzilla baino okerrago daudela. Suña eta Untzilla ondo daude. Badaude gauzak egiteko, baina, kexatu ez gara egin behar.

**Zer daukazu egiteko, bada?**

Errepidearen zati batean istripu asko egoten dira. Oso arriskutsu dago. Asmoa da hori konpontzea. Uren kanal bat doa ondotik, eta gura dugu hodia sartu, porlana bota eta horrela ura kanalizatu eta bidea zabaltu; ea automobil bi gurutzatzeko beste leku lortzen dugun.

**Non dago zati hori?**



*“Auzotik eliza ondora (zaborrak-eta han botatzen dira) zati bat ihunpean dago”*

Aretxabaletatik igota, bada hiruki moduko errepide zati bat. Handik eliza aldera etor zaitezke, zuzen joanez gero, Untzillara edo Zabolara. Hiruki horren goiko punta da leku arriskutsua. Ez da ikusten ezer ere ez.

**Lan hori zeinek egin behar du?**

Uren kanalak garbitzeko eskatu genuenean, hori egiteko ere eskatu genuen, baina, Udalak esan zigun auzo-lanean egin behar direla horrek gauzak. Diote, diru gutxi etortzen dela Diputaziotik udaletxera eta nik uste dut hori auzoetan igartzen dela gehien. Horren ondorioz, horrek lan guztiak geuk egin behar izaten ditugu, auzo-lanean. Errepidea konpontzeko eskaera eginda dago, baina oraindik ez didate baietza edo ezetza eman. Irailetik aurrera egiteko asmoa dugu. Ordurako esango didate zerbait.

*“Eskaera eginda dugu argindarraren kableak, airetik doazenak, zati batean lurpean sartzeko”*

## LABUR

**Bihar, zapatua, kontzertua izango da kultura etxeko zine aretoan**

Araba Kulturalaren barruan, bihar kontzertua izango da, 20:00etan. Bóreas Cámara taldeak joko du. Honakoek osatzen dute taldea: Pedro Basterra (zeharkako flauta eta flauta eztea); Andoni Brea (oboea); Begoña Divar (klarinetea eta flauta eztea); Jose L. Dorronsoro (gitarra eta mandolina); Pablo G. de Eulate (klarinetea eta flauta eztea); Ricardo Brea (biolontxelo) eta Iñaki Alarcia (perkusioa).

**Birziklatzeko bi puntu berri daudela gogora ekarri die Udalak herritarrei**

Aramaioko Udalak gogora arazi gura die herritarrei, Aramaion birziklatzeko bi puntu berri daudela. Bata *Beterinarixuaren txabola* izeneko, sukaldean erabilitako olioak eta erabilitako pilak batzeko da. Txabolako atea egun guztian zabalik dago, hortaz, norberak gura duenean eraman ditzake birziklatzekoak. Eta birziklatzeko beste puntu Iturroste garajea da. Han autoetan eta bestelako motorretan erabilitako olioak batzen dituzte, garajeko ordutegian. Kontua da herritarrek ez dituztela behar beste erabiltzen aipatutako birziklatzeko bi puntuak; hala, Udalak erabilera bultzatzeko etxeko bidali die herritarrei gogora arazteko bandoa.

**Bañera kirol elkartearen etorkizunak oraindik zalantzan segitzen du**

Iraila baino lehen Txirritola aldizkariaren azkeneko alea argitaratu behar dugunez, Bañera kirol elkartearen egoera zein den galdetu diegu elkarte zuzendaritza batzordekoiei. Eta zoritxarrez, jakinarazi digute oraindik ez dela inor aurkeztu lan horrekin arduratzeko gertu dagoenik. Horrenbestez, oraingoz behintzat, Bañera kirol elkarte desagertzeko zori-zorian dagoela esan genezake.

**Gaia erabat aldatuz, egundoko oinaztuak daude gaur; iaz hemengo elizan jausi zen bat, arriskuren bat duzue, ala?**

Hemen oinaztarri asko jausten dira. Lehen aipatutako moduan, dirulaguntza gutxi etortzen dira eta horrek eragina du. Oraingo tximistorratza dirulaguntza barik ipini genuen. Elizara sartu zenean erabaki genuen ipintzea, izan ere, lehenago ere baserri batzuetan sartu zen, Untzillan eta Suñan; Muruk su hartu zuen oinaztarriarekin... Elizara sartu zenean, Emilio abadeak ahalegin handia egin zuen tximistorratza ipintzeko. Hala, haren ahaleginarekin eta auzoko lanarekin ipini genuen. Konponketa batzuk egiteko genuen dirua erabili genuen horretarako eta guk egin genituen konponketak.

**Eta horrekin nahikoa duzue?**

Ez, ez da nahikoa. Hemen besteren bat beharke zen eta baita Suñan ere. Suñan ez dago ezer ere ez, baina...

**Bestela, ura, gasa, argindarra...**

Ura sartuta dago, gasa ez. Orain urte pare bat batzar bat egon zen horren gainean, baina, hortxe geratu zen. Gehiago ez dira etorri. Eta argindarrari dagokionez, plan foralean sartuta dago, baina auskalo noiz egingo duten.